

Ordføreren i Randaberg kommune

Postboks 40
4096 Randaberg

2005/145 - 3197/2006

Gjertrud Jacobsen , 51 96 38 13

29.09.2006

Vedrørende akutttilbod innanfor nevrokirurgi ved Stavanger Universitetssjukehus

Det vises til brev av 25.09.06 vedrørende tilbodet innan akutt nevrokirurgi ved Stavanger Universitetssjukehus (SUS). I det følgjande vil Helse Vest RHF gjøre greie for bakgrunnen for saka, dei vurderingar som er gjort og kva som må til for å sikre befolkninga i Stavanger eit godt nevrokirurgisk tilbod.

Styret i Helse Vest RHF vedtok i 2002 at nevrokirurgi er ein regionfunksjon som skal være lokalisert til Haukeland universitetssjukehus (HUS). Samstundes vart det vedteke å vidareføre akutt nevrokirurgisk verksemd ved SUS.

Styret la og til grunn at dei to helseføretaka skulle samarbeide om verksemda, og det blei satt i gang ein prosess for å få på plass ein samarbeidsavtale mellom dei to sjukehusa for å sikre eit kvalitativt godt tilbod til befolkninga i heile regionen.

I løpet av 2005 viste det seg at denne samarbeidsavtalen ikkje fungerte etter intensjonen. Helse Vest RHF engasjerte då professor Tor Ingebrigtsen, avdelingsleiar ved nevrokirurgisk avdeling ved Universitetssjukehuset i Tromsø (UNN) for å stimulera til auka samarbeid mellom dei to sjukehusavdelingane, og for å klargjere problemstillingar mellom dei to avdelingane. Professor Ingebrigtsen føretok ein gjennomgang av verksemda, og kom med ei tilråding for korleis arbeidsdelinga mellom dei to sjukehusa bør være. Ingebrigtsen fann ikkje at det var faglege grunnar for at SUS skulle utføre planlagde operasjonar for hjernesvulstar. SUS ville i så fall få eit volum på slike operasjonar som ligg under halvparten av det dei har ved Skandinavias minste nevrokirurgiske avdeling (UNN).

På denne bakgrunn vedtok styret i Helse Vest RHF i mars 2005 ei svært konkret funksjonsfordeling mellom dei to sjukehusa. Styrevedtaket legg til grunn at dei nevrokirurgiske avdelingane skal samarbeide tett og at HUS som har regionfunksjonansvaret har eit systemansvar for denne verksemda i regionen. Vedtaket opna på det tidspunktet opp for at det kunne utførast planlagde operasjonar ved SUS i eit tett samarbeid med HUS. Styrevedtaket innebar ei sterk integrering av dei to avdelingane slik at ein kunne sikre eit godt tilbod til heile regionen, og at det blei utarbeid ei ny samarbeidsavtale mellom dei to helseføretaka.

På bakgrunn av dette styrevedtaket klarte dei to helseføretaka i samarbeid å utarbeide ein samarbeidsavtale som innebar ei enda sterkare integrering av dei to avdelingane. Helse Bergen HF har et systemansvar for begge avdelingane og ansvar for vaktberedskap i Helse Stavanger HF. Innsyn og åpenhet mellom avdelingane er ein føresetnad. På denne måten kan de to avdelingane i stor grad sjåast på som eit samla nevrokirurgisk miljø på vestlandet. Avtalen la til grunn at alle intrakranielle svulstar skulle opererast ved HUS. Styret i Helse Vest RHF slutta seg til denne modellen.

Helse Vest RHF legg til grunn at avtalen sikrar eit akutttilbod i Stavanger. Dette er hovudgrunngevinga for nevrokirurgisk verksemd i Stavanger. I tillegg sikrar avtalen anna nevrokirurgisk verksemd i Stavanger, til dømes innan rygg- og nakkeoperasjonar.

Nevrokirurgisk verksemd i Stavanger innanfor dei rammene avtalen skisserer er på 307 operasjonar dei 8 første månadene i 2006. Av dette er det 26 operasjonar for hovudskader. Å sette denne verksemda i fare ved å krevje eit fåtall (20 – 30 operasjonar pr. år) høgspesialiserte, lågvolumoperasjonar for svulstar i hjernen (craniotomiar) er etter vår meining ei unødvendig spissing av problemstillinga rundt nevrokirurgisk verksemd. Vi vil her legge til at vi i andre saker har lagt til grunn at organisering og tilrettelegging av tenestetilbodet innan ramma for "sørge-for-ansvaret" ikkje kan knyttast til enkeltpersonar åleine.

Det er rimeleg fagleg semje om at ein nevrokirurgisk verksemd bør ha eit befolkningsunderlag på ca. 1 million. I dei fire andre helseregionane i landet er det ein regionavdeling for nevrokirurgi. Også dette tilseier eit endå tettare og betre samarbeid mellom Stavanger og Bergen.

Hovudutfordringa for den nevrokirurgiske verksemda i Bergen og Stavanger er ein vanskeleg rekrutteringssituasjon der ein mellom anna konkurrerer med Rikshospitalet/Radiumhospitalet om kvalifiserte spesialistar.

Helse Vest RHF har også motteke førespurnader frå både Den norske lægeforening, Norsk nevrokirurgisk forening og Sosial- og helsedirektoratet som har uttrykt uro for ei oppdeling av det nevrokirurgiske miljøet på vestlandet i to avdelingar. Mellom anna har utdanningsfunksjonen vært eit sentralt tema i dette.

Med bakgrunn i dei eksterne faglege vurderingane som er gjort ser Helse Vest RHF på den samarbeidsmodellen som ein har etablert innan nevrokirurgi i regionen som ein god modell for å sikre eit kvalitativt godt nevrokirurgisk tilbod til befolkninga i heile regionen. Føresetnaden her som i alle andre samanhenger er at avtalepartane leverer etter intensjonane og strekker seg for å få til gode samarbeidsrelasjonar. Dette er ein modell som ein også har etablert innan andre fagområde for å sikre stabile og høgt kompetente fagmiljø til beste for befolkninga i regionen.

Det er på det reine at Helse Bergen HF ikkje har oppfylt sin del av samarbeidsavtalen om å sørgje for vaktberedskap i Stavanger. Dette er beklageleg, og det har vi peika på overfor Helse Bergen HF. Det har no lykkast Helse Bergen HF å få til ei løysning med nevrokirurgar frå Tromsø. Vi har fått opplyst at dette ikkje er dekkande ihht. avtalen, og har derfor bedt Helse Bergen om å intensivere arbeidet med å få på plass ein meir permanent ordning. Helse Vest RHF er derfor av den oppfatning at det akutte nevrokirurgiske tilbodet i Stavanger regionen er sikra, og at samarbeidsmodellen som er etablert er ein framtidsretta måte å innrette tenestene på. Avtalen sikrar og rygg- og nakkeoperasjonar i Stavanger.

Vi vil likevel orientere styret i Helse Vest RHF på første styremøte den 11.10.06. I denne samanheng vil vi mellom anna vurdere om det skal gjennomførast ei ny brei fagleg vurdering som grunnlag for funksjonsdelinga/arbeidsdelinga mellom Helse Stavanger HF og Helse Bergen HF innan nevrokirurgi.

Med helsing



Herlof Nilssen
Administrerende direktør

Likelydande brev er sendt til ordførarane i Sola, Stavanger, Sandnes og Randaberg.

Kopi: Styreleiar i Helse Vest RHF, Oddvar Nilsen
Næringsforeninga i Stavanger-regionen, PB 182 Sentrum 4001 Stavanger
Forus Næringspark AS, Lagerveien 23, 4033 Forus
Rogalandsbenken
Helse Stavanger HF, Helse Bergen HF